

欽定剿平粵匪方略

欽定勦平粵匪方略卷一百三十五 乙卯年

八月初一日

辛卯

官文奏言據署漢陽縣知縣伍

繼勛稟報七月閒撫臣胡林翼紮營三山景水

軍移紮禹糧臺當夜造成火龍船二十餘隻次

日帶水軍知府彭玉麟等用火龍船攻燬漢口

浮橋衝出大江會合撫臣及副將王國才楊載

福等之師水陸並進殺賊無算克復漢鎮復過

河追至漢陽將東西門外土城盡行燬倒撫臣
親冒矢石殺至龜山天晚紮營十六日各路兵
勇齊攻漢陽又將其四面防卡及附城土垣燬
盡再據鹽法道常恩稟稱克復漢川縣城後派
兵分途搜捕餘匪內有僞平湖丞相李何青等
三十餘名復探聞有賊數百在南門七里蘆林
復派李保邦等帶勇出東門李光榮帶勇出西

門王三錫等帶勇出南門追勦殲逆匪百餘
名現在跟蹤追捕並探聞葱擔溝一帶尙有聚
匪亦當撲滅等語臣已飭其一面搜捕餘匪一

面督李保邦等速赴蔡店爲南軍後路聲援至
德安之賊屢次出城躡探擬竄漢川接應均經
兵勇截回參將顏朝斌等帶勇三千全抵應城
已飭商同進剿並飭隨州知州嚴樹森激勵鄉

團嚴堵歧路臣卽日馳抵涇口相機策應務期
掃蕩妖氛奏入

上命軍機大臣傳諭西凌阿綿洵官文曰此次漢川漢
口先後克復漢陽逆匪亦已窮蹙德安賊援已斷其
圖竄漢川者復經兵勇截擊殲擒若能乘此機會南
北夾攻何患德安不克官文所派顏朝斌等一軍現
在全抵應城正當德安之西南該督親往涇口當德

安之東南西凌阿若株守隨州不思進取豈將以克復之事全委之南軍耶況該大臣兵勇不下八千隨州團練數逾二萬北路聲勢不爲不壯何以連日尙未進兵朕授西凌阿爲欽差大臣原不專爲德安計今併一德安亦不能克任意遷延一至於此試問何顏對朕著卽督帶官兵團勇迅速前進與南路兵勇前後夾擊務將德安府城剋期收復不得再有耽延

官文現往涓口正可上援德安下應漢陽著一面會
合西凌阿迅速夾攻一面與胡林翼聲勢聯絡以期
肅清江北毋失事機

初二日

壬辰

托明阿陳金綬雷以誠奏言查瓜州

稻埕葦港道路紛歧若非先築長圍難以杜賊
旁竄臣等公同商議趕築西路長圍迤邐而南
將及土橋仍連日出隊分攻賊壘上月初五日

瓜賊突出一千餘名分股徑撲土橋意圖平毀
長圖臣托明阿卽督率德興阿等截擊並經水
師總兵陳國泰登岸迎截賊卽潰散初七日接
吉爾杭阿密爾約定次日寅刻力攻銀山賊營
同時出隊當卽分飭水陸各營均於是夜五更
進攻瓜州臣托明阿陳金綬分路進兵臣雷以
誠亦由虹橋等處進取誘賊出巢各兵勇槍礮

齊發奮勇向前共斃賊約三百餘名餘賊敗退
十五日夜賊復欲撲土橋經陳國泰開礮擊回
至金陵之賊遣車輪船三十餘隻來援於十三
日撲近水營總兵李長春等分投截擊六合縣
知縣溫紹原亦派水勇堵賊去路殲斃多名浦
口水勇及陸路總兵武慶等均聞礮聲出隊接
應並據武慶稟報十一二十四等日賊船疊

竄二江新江等口滋擾經該鎮飭派弁勇奮力
勦殺奪獲大小賊船五隻糧米礮械無數臣等
查金陵首逆狡詐尤多似此水陸聯絡屢挫賊
鋒誠足以壯軍聲現仍嚴飭上游水師加意防
範不容一船下竄其陸路東西長圍業已竣工
卽當設法進攻斷不敢坐淹時日奏入

上命軍機大臣傳諭托明阿陳金綬雷以誠曰所奏進

攻瓜州情形僅祇逐日出隊小有斬擒於克復機宜
毫無把握所築土圍西連土橋東近虹橋距賊壘皆
已甚遠僅能阻賊撲營豈能制賊死命若竟恃爲長
策該逆雖不能東西旁竄而南面仍復通江於事何
益況吉爾杭阿既有南北並舉之議則鎮江得手之
時瓜州卽應實力攻擊乃初七日之戰亦祇誘賊出
巢奮力擊退有何出奇制勝該大臣等清夜自思能

無愧悚托明阿營中尙多宿將務各奮勉圖功剋期
攻克瓜州不得再有延緩其金陵下竄賊船卽飭知
葉常春等及陸路防堵之武慶等嚴加防範覽此次
所奏浦口水陸勝仗較之瓜州尙有實際仍著賁成
該總兵等實力堵截並隨時與陳國泰師船聯絡使
西南兩面聯爲一氣以杜該逆窺伺

初三日

癸巳

向榮奏言查我軍攻克蕪湖縣城尙

餘濱江石壘及小河南北兩賊營未破該逆糾集四合山及東西梁山黨與四五千人併夥踞守總兵德安明安泰卽日會督各兵勇分屯東北兩路並堵紮東南小河派兵入城守禦自六月二十日後出隊會勦寶塔根賊壘各將弁兵勇奮力前攻焚燬賊卡兩重攻破壘外濠塹水師亦於江面開礮環轟賊勢已蹙乃該逆復於

范羅山添築礮臺並敢疊次出巢拒戰自係東
西梁山並四台山之賊援未斷我軍雖步步進
紮終難得手因卽派隊將長山營盤趕緊一律
築成當派湖南兵及壯勇臺勇分紮二營黔兵
勝勇合紮一營聲勢聯絡鄧紹良亦於小河南
將彪勇營盤移進偪賊於河邊查長山紮定五
營既可遏斷梁山援應並絕該逆逃竄之路當

卽飭該提鎮等乘此聲勢水陸併力剋期將賊
壘蕩平全據上游要隘然後上下勦洗肅清沿
江則大局得有把握奏入

上命軍機大臣傳諭向榮吉爾杭阿曰我軍攻克蕪湖
後濱江賊壘尙未攻破長山五營甫能紮定不可不
加意慎重著向榮督飭該提鎮併力合謀先將寶塔
根石壘埽平俾蕪湖險隘不致得而復失一面嚴飭

水師各營豫防上游賊船乘隙下襲我軍據守險要
然後乘勝勦洗庶可肅清

同日陳啟邁奏言據羅澤南林懋勳等稟稱義甯州城賊匪三四千人擄搶民船數十隻於六月二十日竄至義甯武甯交界之三都梁口洋湖陳莊一帶焚掠林懋勳恐賊下竄武甯卽率領弁兵練勇於澧溪暗頭山沿河地面駐紮堵

禦該逆知武邑有備旋即退回七月初五日林
懋勳進紮三都山上總兵劉開泰亦移營黃沙
橋羅澤南詢知該州居萬山之中南憑修江北
倚鳳凰山西通銅鼓營及兩湖之平江通城等
縣東則峻嶺複嶂修江中流直達武甯江之南
岸爲梅嶺高逾十里係梁口入州大路峭隘異
常該逆踞崖聚石以待人不敢度惟由梁口渡

江繞南嶺鳳凰山之背可達西門坑正擬由該處前進詎州城賊匪於初八日由梅嶺來撲梁口營盤一股循修江南岸而下約四五千一人一股由左路而下約三千餘人多用州城旗幟冀混官兵其後路埋伏甚多羅澤南飭令知府李續賓知縣唐訓方督勇繞出山阜以擊左路之賊又派勇數百名埋伏山阿策應羅澤南督同

蔣益澧率湘勇中左二營排列營前以擊沿江之賊按兵不動相持一時知賊之氣已竭始揚旗振鼓大呼而進擊斃長髮騎馬悍賊多名李續賓等從山後繞出橫衝左路賊陣擊斃長髮騎馬悍賊八九名各營奮力追殺共計斃賊七八百名賊之沿江而逃者又爲我軍繞前截住賊遂涉水渡河溺斃者以數百計當賊撲梁口

時林懋勳亦自三都率領兵勇循北岸而上以爲策應賊之浮江而過者悉爲林懋勳兵勇所殺不下七十餘人南岸敗匪經羅澤南等追逐二十餘里又生擒三十餘名卽日由四都進攻西門坑劉開泰自黃沙橋移營湘竹進偏豬灣灘賊營林懋勳駐紮四都彭姑地方防賊自南嶺而下襲我餉道兼可相機助剿等情臣查羅

澤南等帶領湘勇甫抵梁口地方州城賊匪卽
率衆前來撲營經羅澤南等分路迎擊先後斃
賊甚多實足以挫兇鋒仍飭乘此聲勢迅速夾
攻以期收復州城在事出力員弁容臣查明另
行請獎奏入

上諭內閣曰此次勦辦尙爲得手仍著該鎮道等乘此
聲威攻克州城迅殄醜類所有打仗出力員弁著卽

查明保奏候朕施恩

初七日

丁酉

和春福濟奏言查廬郡外援賊匪經

臣等督率官兵節次攻勦勢雖漸蹙仍復負隅
七月十四以後連日冒雨急攻每次斃賊三四
百名踏毀賊營四座十九日突來逆匪將及萬
人分路直撲柘皋營盤伊林布等帶同團練退
往北竄之路該逆擁至河邊我軍攻擊甚久斃

賊多名賊乃分股從黃山雙廟兩路繞出三四
千人竄入街內伊林布等趕至街口殲斃無數
逆匪復由河下分路抄來愈聚愈多伊林布楊
萬傑均力竭陣亡該逆槍至河北圍撲總兵吉
順營盤臣和春隨即挑選精銳於二十一日行
抵柘皋幸吉順督率官兵防守甚固臣和春整
齊隊伍分左右抄擊兵勇槍礮齊施馬隊衝突

立斃賊匪甚多三路賊同時潰敗我軍追殺將
賊營圍攻火箭噴筒絡繹施放營內之賊紛紛
逃出湖南兵首先搶進賊營盡力砍殺卽將賊
營四座踏毀餘匪均向河邊敗逸河州兵攔頭
截勦又斃多名落水死者不少二十二日臣和
春復親帶兵勇左右圍勦賊由山後敗逃我軍
追殺三十餘里零星竄匪又經沿路百姓痛殲

共計兩日斃賊三千餘名生擒六十七名奪獲軍械不計其數隨由廬州飛調馬步兵在柘皋分紮扼堵二十五日探得逆匪在廬城西面之大蜀山築壘意欲前進當令常清等圍攻外委賀世鵬衝入賊隊手刃數賊受傷陣亡兵勇齊聲呐喊殺賊無算該逆敗奔我軍追殺十餘里立將賊壘毀平查遊擊伊林布千總楊萬傑外

委賀世鵬臨陣捐軀深堪憫惜應請

飭部從優議卹以慰忠魂總兵吉順鎮靜嚴守俾援兵
前往立解重圍實屬膽識俱優合無仰懇

天恩賞戴花翎以示嘉獎各員弁兵勇奮勇可嘉可否
准臣等擇尤酌保出自

逾格恩施奏入

上諭內閣曰廬州外援賊匪經官兵節次攻剿將賊壘

毀平著和春等函圖克復廬州毋再玩延遊擊伊林
布千總楊萬傑外委賀世鵬殺賊勇敢臨陣捐軀均
著交部從優議卹總兵吉順紮營河北當逆股大至
鎮靜嚴守俾援兵趕到得解重圍著賞戴花翎其餘
出力員弁兵勇並著和春等擇尤保奏候朕施恩

初八日

戊戌

和春福濟奏言自舟師勦賊南岸江

北空虛芝麻港逆賊四出擄掠七月二十一日

經知州徐曉峯等帶領兵勇沿途搜捕忽見逆卡紛出騎馬賊多名三股分抄適知府葉法知縣鄧楚翹各帶義勇知州金寶樹率領團練均由西南衝擊追殺四十餘名奪毀卡房一座葉法等分隊前進徐曉峯往來策應賊衆突出三百餘人開礮相迎各兵勇於煙燄之中一擁而上殺賊百餘名立將卡樓焚燬直抵芝麻港老

巢我兵越進重濠逆賊登陸救援鄧楚翹揮勇
迎擊斃賊六十餘名衛千總封度繼進被賊兩
面兜圍鄧楚翹中槍落水陣亡封度同時遇害
徐曉峯等督兵救護槍礮齊施斃賊二百餘名
生擒張汝亮等三名該逆受創奔竄計是日自
辰至申鏖戰五時之久正撤隊時賊又大股抄
出我軍更番疊戰復斃賊數十名此次奮力偪

圍賊已大創惟知縣鄧楚翹千總封度均被賊
堯圍力竭捐軀深堪憫惻籲懇

天恩飭部照例議卹奏入

上諭內閣曰沿江賊匪在北岸芝麻港時出擄掠經和
春等督軍剿辦尙屬得手著卽乘此聲威迅殲醜類
打仗陣亡之知縣鄧楚翹千總封度均著交部照例
議卹

初九日

己亥

陳啟邁奏言據羅澤南劉開泰稟報

逆賊久踞義甯州七月十三日羅澤南與知府
李續賓等偃旗捲旆度小南嶺以上鰲嶺守嶺
之賊不料官軍驟至紛然逃竄我兵奮勇而上
斃賊百餘人遂據其嶺正籌度駐營間賊衆六
七千繼至我軍復尾追至乾坑又有賊二千餘
人由小路踞乾坑山脊蔣益澧移軍駐紮乾坑

隘口賊衆七八千人分路抄來羅澤南率同知
縣唐訓方等併力夾擊斃賊六百餘人生擒五
十餘名鼇嶺距州城七里蟬聯三峯一峯上峻
下平羅澤南率中營駐之其次嶺長而瘠瘦李
續賓率右營駐之又其次峯高而銳築望樓其
上賊之來蹤莫能遁蔣益澧率左營駐嶺之左
唐訓方率訓字營駐嶺之右十四日股匪四五

萬分五路而來我軍上下夾擊殺斃一千六七百人經各勇追殺又斃二千餘人其右路之賊占踞雞鳴峯巔四面被圍殺斃跌斃者甚多統計斃賊六千餘人生擒二百七十餘名奪獲大小旗三百餘面十五日劉開泰於南岸分路進兵直擣賊營殺斃三四千人斬獲首級五百餘顆生擒二百四十餘名是日午刻羅澤南復派

兵於鳳凰山等處截殺焚燒賊營賊匪進退無
路投水者千餘人十六日劉開泰羅澤南約同
南北兩岸合剿各兵勇奮力登城州城卽時克
復殺斃賊匪千餘人生擒四百餘人查江省連
年勦賊戰功之盛莫過於此自應擇尤保奏先

懇

恩施奏入

上諭內閣曰此次江西勦辦義甯踞賊連獲大勝克復
州城洵屬得手浙江甯紹台道羅澤南著賞加布政
使銜贛州鎮總兵劉開泰著交部從優議敘知府李
續賓著交軍機處記名以道員請旨簡放知縣李杏
春唐訓方均著以同知直隸州知州卽選縣丞蔣益
澧著以知縣補用並賞加同知銜訓導鍾世楨著以
知縣升用從九品蕭積仰著以府經歷縣丞卽選千

總吳邦柱吳邦樞孫衡山均著以守備補用守備林保戴正才均著以都司升用其餘在事出力員弁著准其彙案奏請獎勵

陳啟邁又奏言提督塔齊布於七月十八日心悸不省人事午刻在營病故猝遭此變文武軍民無不同深傷感其原領一軍現據曾國藩來咨業經親往潯營分別部署以杜城內逆匪乘

勢衝突奏八

上諭內閣曰湖南提督塔齊布由侍衛揀發都司洊升副將在湖南剿賊疊著戰功朕知其忠勇奮發超授提督上年帶領官軍克復武漢追賊九江身經百戰所向無前疊經朕賞戴花翎賞給喀屯巴圖魯名號騎都尉世職賞穿黃馬褂該提督年力正壯方冀迅克尋郡渥膺懋賞乃據陳啟邁奏該提督陡患心悸

甫經半日在營病故披覽之下悼惜殊深落齊布著
照將軍軍營病故例賜卹准其入城治喪任內一切
處分悉予開復應得卹典該衙門察例具奏並著該
旗查明該提督子嗣百日後帶領引見候朕施恩

十一日辛丑官文奏言接據探報德安賊匪分股

竄至應城兩河口地方攻撲營盤顏朝斌帶兵
繞道夾攻都司馬天貴奮勇直撲手刃數賊賊

始敗退追殺數里斃賊七八百名南路官兵攻
克漢鎮後署撫臣胡林翼督率攻城武昌漢陽
逆匪數千分三股來撲大營兵勇迎擊鏖戰四
時始行敗退回巢次日逆賊又分六路齊撲署
撫臣大營復有賊船對營施放大礮大營安然
不動相持數時我營兵勇奮力突出署撫臣亦
身先士卒復得李光榮帶領水陸各軍接應轟

聞

斃賊匪數千追殺不計其數僉謂此戰爲非常之勝現在賊已膽寒克復不遠臣權紮仙桃鎮隨身兵勇數百藉沔陽團練之衆爲諸後路應援卽當相機調度隨時策應奏入報

十三日癸卯曾國藩奏言查提臣塔齊布肫誠報

國忠勇絕倫自其爲都司時毅然有殺賊立功之

志上年蒙

恩超擢提督出師岳州途次於左臂涅刺忠心報

國四字每戰匹馬當先或他營被賊圍困輒躍馬馳往救援湘潭之戰被賊圍攻縱身越牆得脫崇陽黃梅兩次受傷均以麾下易馬扶去得脫小池口之戰羣賊曳其馬尾揮刀砍之卒能縱橫衝突轉敗爲功賊中驚以爲神而該提臣雍

供稱前有漢陽敗賊來城調去三千名此時德
安尙有賊五六千名遣人往金陵求救臣等分
撥兵勇進攻府城該逆由北門擁衆迎撲我兵
奮力轟擊賊衆潰敗復乘勢追殺直抵北關殺
賊數百名生擒數十名該逆旋即敗退東門亦
竄山賊匪被兵勇斬殺甚多其西門竄出之賊
匪二千餘名被各營壯勇合力攻擊殺斃千餘

名生擒數十名惟官文前派參將顏朝斌帶領
川勇由應城約期夾攻尙無音信臣等現督兵
三面進攻勢尙聯絡但難兼顧城南誠恐逆匪
乘虛抄襲不得不加嚴防更恐由南逃竄截剿
不可無兵因飛咨督臣官文速飭參將顏朝斌
趕緊督兵進剿約期夾攻以分賊勢奏入

上命軍機大臣傳諭西凌阿綿洵官文曰據西凌阿等

奏進攻府城疊有斬擒覽所奏情形東西北三面尙
皆聲勢聯絡惟南面一帶無兵截剿官文前派顏朝
斌由應城取道前往會攻何以日久未到該督現又
將川兵派往顏朝斌處是該參將所帶兵勇較多著
卽嚴行札催飭令迅速前進截住德安南面俾該逆
無從下竄則攻克較易據西凌阿等奏獲犯供出德
安之賊竄回漢陽者三千名存城之賊不過五六千

人並有已往金陵求救之語是該逆不能堅拒必圖南竄卽死守待援亦必從南面勾結其漢川漢陽兵勇藏船雖有常恩管領是否足恃魁玉等駐紮仙桃鎮能否嚴扼中路並著官文妥籌布置德安府城固不可不以全力進攻胡林翼一軍深入無援亦不可不爲接應西凌阿此次進政府城仍未見實有把握此時各營兵勇已步步進紮卽著迅速設法務將城

池攻克以便與官文合兵南下直擣漢陽

同日胡林翼奏言漢陽蔡店賊匪屢次大股犯
撲麥山臣於七月初五日帶兵千餘渡江擊退
初六日仍回金口初八日探稱賊匪又糾大股
來犯臣思往返馳援不如深入力戰卽調水師
左營知府彭玉麟帶領三板礮船由沌口繞出
蔡店臣親督各勇四千名於初九日渡江渡湖

十一日拔營進抵東山十二日該逆又由蔡店分五路來撲我營臣卽飭各勇分五路以待之俟其偏近乃親督各勇鼓行而前連斃賊匪百餘名我軍一齊乘勝衝殺直徧蔡店沿途殺斃及溺斃賊匪約二千餘人敗匪沿河逃竄適彭玉麟帶同後營都司張啟基中營守備鮑超各領三板礮船由沌口繞八十二日行抵蔡店彭

玉麟等催檣前進首先開礮轟斃騎馬黃衣賊
目一名又登岸追殺陸軍四面圍攻斬殺三百
餘人盡將賊船轟翻蔡店卽時克復十五日臣
營及水師各營移紮高廟水陸並進分攻漢陽
漢鎮南北兩岸賊匪併力抗拒經彭玉麟會同
副將楊載福激勵水師自十五至二十五連日
奮力攻勦北岸宗關南岸慈渡菴五顯廟等處

賊巢悉行平毀並斬斷襄河口鐵索浮橋上下
游分泊賊船焚燬殆盡乘夜搜捕漢口餘匪生
擒僞官蕭潮富僞軍師吳會元等並長髮二百
餘名正法其塘角賊船亦先經楊載福燒燬至
漢陽城內之賊於大別山等處分築營盤以死
守臣卽於十五日將陸軍分作三隊進攻並
飭副將王國才帶兵協剿十五至十八等日攻

破大別山等賊壘數處其南岸金口軍營屢有
武昌崇通之賊潛來窺伺經臬司李孟羣等斬
擒老賊一百數十人臣思該逆踞守已歷數月
之久此時大局德安尙未得手而南岸金口北
岸潰口實爲全局關鍵如兩處慎守不失則水
陸之後路無虞而德安之賊勢已孤水師深入
險地轉戰十日破賊壘十餘座奪賊船數十隻

奪大礮三百餘尊焚賊資糧船六百餘隻血戰
尤苦出力弁兵可否仰懇

天恩先行獎勵其陣亡員弁並請分別

賜卹奏入

上諭內閣曰胡林翼等水陸官軍連日轉戰統計攻破
賊壘十餘座焚燒賊船六百餘隻奪獲賊船數十隻
大礮三百餘尊擒斬賊匪四千餘名並生擒僞官蕭

潮富僞軍師吳會元等正法餘匪焚斃溺斃者不計其數辦理極爲得手所有尤爲出力之知府彭玉麟著記名以道員用守備鮑超著以都司補用並賞加遊擊銜都司張啟基著以遊擊補用守備孫昌凱著以都司卽補並賞換花翎千總蘇在位著以守備補用並賞加都司銜把總張開榜著以守備卽補都司李成謀著以遊擊補用守備張榮貴王明山均著以

都司升用並賞換花翎萬化林李濟清均著賞加都司銜並賞換花翎外委喻俊明瞿定國均著以千總卽補並賞戴藍翎六品軍功陳發翔易光南均著以把總拔補並賞戴藍翎外委危廷貴六品軍功梁昌周得勝章尙爵均著賞戴藍翎外委何瑞祥鄭陽和均著以千總拔補並賞加守備銜賞戴藍翎其餘出力員弁兵勇著胡林翼查明保奏守備黃開進唐培

植千總蔡宏元把總王席珍王席義外委張輔童玉
庭陸洪福金芝龍六品軍功蔣青海王鳳岐樊丙南
何肇昌力戰陣亡殊堪憫惻均著交部從優議卹其
餘陣亡弁勇並著咨部請卹

二十日

庚戌

向榮吉爾杭阿奏言鎮江逆賊於七

月十七日大隊突出東門經余萬清督飭兵勇
迎頭截擊臣吉爾杭阿復督飭各營進攻西南

二門並於沿江堵截金山瓜州來援之賊十八
日有零星賊匪在東北一帶窺伺經官兵追逐
卽逃竄入城十九日臣吉爾杭阿馳赴京峴山
會同余萬清調度出隊時已黎明該逆分作四
股由東門東北城根甘露寺等處撲出經參將
周兆熊千總俞承恩等分路迎勦見有賊目揮
令人夫砌築土堰經周兆熊等抽兵兜截立將

其所築營基礮臺土壘全行平毀逆勢不支狂奔入城二十一日該逆又分四股而來經劉存厚等分路攻截臣吉爾杭阿與余萬清親督大隊四路並進槍礮齊施自辰至酉共斃賊匪五六百名割奪耳級旗械不計其數賊匪敗退臣等仍當隨時激勵將士力圖進攻以期滅此朝食奏入

上諭內閣曰此次鎮江勦匪業經連日獲勝仍著吉爾杭阿豫福將士趕緊攻克城池毋再遲延

二十四日甲寅曾國藩奏言七月十四日賊船由

驛山來撲水營蕭捷三等用礮轟擊賊衆敗奔我軍追勦至四十里始行收隊是日聞知李元度等統帶平江勇三千餘名由南康渡湖行至段家鋪搜拏僞監軍旅帥等十一名十九日進

至文橋生擒僞總制劉得勝等十一名均訊明
正法二十一日至蘇官渡探知湖口逆首僞承
宣胡鼎汶親率悍賊千人來撲我軍三路迎剿
行至曹均橋見賊馬三十餘匹駐阜瞭望各軍
爭先開礮鏖戰一時陣斬賊目多名該逆復退
奔五里至蘇官渡過壩復駐山岡卓旗搦戰我
軍併力馳擊追至三家市斃賊五六百名奪獲

旗幟器械無數二十三日李元度等三路並進
直抵湖口賊舟用礮回擊我軍誓死不退用擡
礮轟斃船賊多名其城內賊營溝寬丈餘各勇
從礮煙中一躍而進踏毀營牆斃賊及蹂踐死
者三百餘人隨將城內火藥局糧局焚燒我軍
旣入湖城蹋平賊營二座惟瀕湖下鍾山賊壘
尙存牆極堅固地尤險峻中藏悍賊千餘我軍

大呼躍近連擲火毬該逆亦以礮石火彈相擊
拒戰數時殺賊百餘人是日水師各營亦抵湖
口遙見陸兵已臨城下皆奮勇直進後營都司
蕭捷三見賊兇悍揮旗大呼陷陣諸船隨之並
進意欲乘勝直下不意下鍾山及梅家洲兩岸
賊牆排礮齊發蕭捷三中礮陣亡我軍雖折一
將各營仍奮力向前當賊舟出巢時乘勢而入

頃刻之間衝出賊卡駛至大江之外賊敗船亂
我軍環攻賊舟近前拋擲火彈將下鍾山賊礮
船二十五隻立時燔燬其裝載火藥者亦皆燬
滅二十四日陸軍舁銅礮數尊對下鍾山賊牆
轟放賊情窘迫突開南門出數百人登山劫礮
又殺其數十人二十五日李元度等以下鍾山
賊卡急難攻克仍紮離縣十二里之蘇官渡臣

查該逆久踞湖口恃有下鍾山與梅家洲對峙
踞險築卡堅如石城水軍經過莫敢偏近目下
陸軍雖入縣城水軍雖衝出大江而兩岸賊牆
未破必須厚添勁旅先奪下鍾山之卡使梅家
洲賊卡勢成孤立然後水師紮出外江乃操勝
算現復籌添陸兵前往助剿此次殺賊千餘名
受傷兵勇至二三百名之多實屬勇敢出力籲

《中国音乐》

1118

1

上諭內閣曰此股賊匪經官軍水陸會剿連獲大勝著
曾國藩督飭各軍迅將下鍾山梅家洲等處餘匪悉
數殲除所有在事出力員弁兵勇卽著查明保奏都

司蕭捷三帶兵以來屢立戰功茲以銳意陷陣中礮陣亡深堪憫惻著交部照副將陣亡例議卹

二十五日卯乙和春福濟奏言臣等探聞逆匪在

大蜀山一帶偷築營壘卽帶領兵勇馳往攻剿並派常清等分途抄擊該逆拌死抗拒我軍齊聲吶喊連放槍礮逆匪傷斃甚多楚兵搶上賊壘衆軍一擁而入卽將賊營四座焚燬復趕殺

十餘里共斃賊六七百名砍獲首級一百三十餘顆奪獲槍械一百數十件逆匪二千餘人復來南面窺伺卽經臣等馳往督同常清等三面兜圍奮力急攻賊衆大潰復趕殺三十里焚燒巢穴二處斃賊六百餘名砍獲首級八十三顆奪獲軍械一百餘件臣等查援廬之賊多至三萬有奇經我軍疊加懲創殲除大半惟城內餘

華尙復死力堅守現於南面要路開挖濠溝二
道深寬丈餘於合圍之中杜其偷越釜底游魂
斷難久踞

和春福濟又奏言接秦定三來函七月二十四
至二十八等日督兵分攻舒城各門斃賊數十
名暨十餘名不等並拏獲僞軍帥蔡潮升僞司
馬馮維周二名八月初一日復分攻各門兵勇

一鼓作氣火罐噴筒絡繹拋擲約斃賊三四百
名初九日督同郝光甲等先攻北門外賊營並
令各營官兵堵截東西北各門鏖戰一夜之久
又斃賊二百餘名奏入

上命軍機大臣傳諭和春福濟曰逆匪於大蜀山一帶
偷築營壘經和春等督兵將賊營奪獲殲賊多名惟
廬城未下兵勇連日環攻賊猶死拒現於南面要路

開挖壕溝固可杜賊紛竄之路但於官兵進剿有無
隔礙似非長策現在外援之賊殲擒不少廬城賊黨
諒必無多該提督等當乘賊勢窮蹙之時奮力進攻
迅圖克復秦定三一軍攻剿舒城屢次陳奏無非互
有勝負殊屬延玩並著和春等飭令迅速攻剿剋期
收復毋得任意遷延自干咎戾

二十六日

丙辰

官文奏

臣於八月初八日屢接

探報崇通股匪勾結武昌賊衆竄撲金口李孟
羣力戰四日衆寡不敵陸營失守水師勢孤胡
林翼大營在漢陽三面受敵移紮麥山賊率大
股來撲各勇以八十餘日無糧多有潰散暫依
礮船退泊紗帽山趕緊招集潰勇整頓隊伍再
圖進取等情臣當卽飛催已往德安各軍先行
隨同剋期進攻臣卽布置中路各軍扼要嚴防

添調兵勇以固大局並趕派軍功馬鉦帶勇千
名往助常恩攻勦並飭各鄉團勇嚴守上竄荆
襄要隘現接探報由蔡店上竄之賊經常恩率
勇擊退漢川以上並無賊蹤襄河尙可無虞惟
金口一失大江關繫甚重聞在江西防勦之道
員羅澤南由義甯追賊已到崇通搜捕股匪離
武昌甚近可以應急臣已飛調前來金口會同

李孟羣等攻勦其撫臣暨水師各營之餉現已有趕到者趕緊收拾尙可支持臣隨卽趕赴應城一路督勇攻勦以期早克德郡合兵南下現報初九日德安城外之賊已經官兵等殲斃甚多焚盡西北附郭賊巢進圍郡城尙屬得手胡林翼與賊鏖戰最久不避鋒鏑屢破奸謀實爲賊之所畏西凌阿綿洵在德安策勵軍心不辭

勞瘁盡心竭力亦必不使逆賊久踞也奏入

上命軍機大臣傳諭官文胡林翼曰胡林翼一軍前由金口力戰渡江進逼漢陽茲因崇通股匪竄撲金口李孟羣力戰四日衆寡不敵以致陸營失守水師勢孤胡林翼與李孟羣素來用兵尙合機宜現雖兵勇潰散逆燄復熾諒能重整隊伍不致頓挫軍威羅澤鼎已至崇通官文現已調赴金口會勦該處距武昌

不遠著胡林翼就近傳音催令迅速赴援勿稍誤
蔡店上竄之賊已經擊退襄河似可無虞該督布置
中路情形亦屬周妥惟當會督兵勇速攻德安以期
及早克復然後合兵南下則胡林翼一軍不至孤立
而武漢各城亦可次第奏功